



**UDRUŽENJE GRAĐANA ZA POVRAT STARE
DEVIZNE ŠTEDNJE U BiH i DIJASPORI**

RAIFFEISEN BANKA
ž.r. 1610450036820073
e-mail: nnisic@spinter.net
www.starastednjabh.org

Sjedište: Banja Luka 78000
I. G. Kovačića 139b
tel. 051/380-738
fax. 051/381-374

UPRAVNI ODBOR

Broj: 1536/10

Banja Luka, 09.02.2010.

SAVJET MINISTARA BOSNE I HERCEGOVINE

Trg BiH 1.

71000 Sarajevo

- putem Generalnog sekretarijata

**Predmet: Inicijativa za pravično i jedino moguće rješenje stare devizne
štednje u Bosni i Hercegovini**

Poštovani,

Na našu veliku žalost mi, stare devizne štediše u Bosni i Hercegovini možemo samo konstatovati da se kriminalistička farsa zvana "stara devizna štednja" nastavlja sa novim zapletima i akterima. Na vještini režiranja cijele ove u suštini jednostavne, ali najveće pljačke koju pamti savremena Evropska civilizacija mogli bi zavist iskazati i proslavljeni režiseri latino sapunica. Međutim, u svom samom početku, koji se veže uz raspad bivše SFRJ, osnovna poenta moćnih režisera je bila jednostavna pljačka deviznih štediša. Ušlo se u Centralne banke i u vrećama iznijele devize koje se godinama njihovi vlasnici polagali na svoje štedne knjižice. U većini država koje su nastale raspadom bivše SFRJ tu je otprilike i završila epizoda sa starom deviznom štednjom. Navodno su sredstva iskoristili za odbranu – rat i slično, mada su u suštini tim sredstvima pored političke moći koju su neograničeno uživali prigrabili i ekonomsku moć i postali stvarni vlasnici profitabilnih privrednih subjekata i atraktivnih nekretnina, koje donose visoke rente. Odmah po smirivanju situacije i početku oživljavanja privrede vratili su staru deviznu štednju njenim vlasnicima i ta sredstva su uglavnom iskorištena kao snažan poticaj u privatizaciji i privrednom razvoju.

Samo su maštoviti režiseri u Bosni i Hercegovini istrajali i evo i danas kada se od apstinencija nad vlastitom deviznom štednjom navršilo više od 18 godina sa jednakim žarom smišljaju kako će izgledati nove i nove epizode. Sve je isto samo deviza nema za njihove vlasnike, ili još bolje rečeno sve je isto, bogaćenje na račun stare devizne štednje se nastavlja do u nedogled i u fantastičnim iznosima. Ohradbreni ili bolje rečeno inspirisani odnosom Bosne i Hercegovine prema njenim građanima banke iz Republike

Slovenije i Republike Srbije prelaze na isti scenario, te ni one ne isplaćuju štediše iz Bosne i Hercegovine. Štediše iz svoje matične države su naravno davno isplatile i obeštatile.

Sigurno se stare devizne štediše, a poneki poštenu nezainteresovani građanin, kao i oni – režiseri sjećaju epizoda zvanih "rok isplate od 39 godina".

Kasnije epizode su imale i izvjesne zaplete sa značajnijim ulogama Ustavnog suda BiH, Evropskog suda za ljudska prava u Strazburu i onda i uključivanje Parlamentarne skupštine BiH i donošenje zakona o ovoj oblasti na nivou BiH i rokom otplate od 13 godina i kamatu od 0,5%.

Svježa su sjećanja na aktuelnu proceduru "izmjena i dopuna" kojima se rok skraćuje na 9 godina, a štediše se žele prevarom navući na verifikaciju da bi umjesto vlasnika stare devizne pštednje postali vlasnici cifri koje su im ovjerali i upisali budući robijaši u APIF-u.

Samo se jedan događaj ili, ako nastavimo u dosadašnjem žargonu, jedna epizoda može samatrati koliko toliko svjetlim pokušajem poštenog i pravednog rješenja. To je Zakon o izmjenama i dopunama Zakona o izmirenju obaveza po osnovu računa stare devizne štednje, koji je Predstavnički dom Parlamentarne skupštine usvojio 18. septembra 2006. godine. Usvajanjem ovog zakona predstavnici zakonodavne vlasti u Bosni i Hercegovini su se bar na trenutak izdigli iznad kriminalnog miljea i donijeli odluku koja je bila odlučna brana kriminalnim krugovima za nastavak bogaćenja na staroj deviznoj štednji. Međutim, kao i pravoj latino sapunici to nije bio kraj. Dom naroda Parlamentarne skupštine, aktuelnog saziva se stavio u funkciju onih koji nastavljaju pljačku i priča se po ko zna koji put vratila na početak.

Poštovana gospodo,

Da li je Bosna i Hercegovina država u pravom smislu te riječi ne mjeri se samo po tome ima li poslanike, ministre, vojsku policiju i Ustavni sud, nego i po tome da li se u njoj poštuju ljudska prava i da li je ona izvršava sve svoje međunarodne obaveze i obaveze prema svojim građanima. Bosna i Hercegovina je možda najmanje zadužena država kod međunarodnih institucija, ali je više dužna svojim građanima od bilo koje države u svijetu.

Ako istinski želite da Bosna i Hercegovina bude država i Vi ministri i poslanici u njoj dužni ste učiniti odlučne korake u pogledu poštovanja ljudskih prava u toj državi kroz pravo raspolaganja privatnom imovinom i vraćanjem stare devizne štednje njenim vlasnicima. Tako bi joj skinuli tu omču oko vrata, a još veći korak i doprinos bi bila eliminacija permanentnog areala za kriminal i korupciju najširih razmjera. Sve ako to i ne želite dužni ste sa pozicija poslova koje obavljate štiti i poštovati zakone, a u protivnom morate biti spremni da računete na to da će jednoga dana ruka pravde stići sve one koji su činjenjem ili pak ne činjenjem učestvovali u pljački koju će nauka još proučavati i koju će iostorija kriminalističkih nauka rangirati na najviše mjesto koje joj pripada i po visini opljačkanog novca, broju aktera pljačkaša i oštećenih i po dužini trajanja. Na žalost izgleda da će se posebno visoko rangirati i po uključenosti najviših državnih organa i osoba zaposlenih u tim državnim organima u pljačku.

Udruženje građana za povrat stare devizne štednje u Bosni i Hercegovini i dijaspori je osnovano sa prevashodnim ciljem za povrat stare devizne štednje. Međutim, suočeni sa pljačkom neviđenih razmjera i sa blokadama u koje su uključeni korumpirani pripadnici vlasti mi kao prioritetan cilj na regionalnim skupštinama koje ovih dana održavamo, definišemo raskrinkavanje i privođenje pravdi svih lopova, kriminalaca i njihovih pomagača koji su opljačkali staru deviznu štednju i sada se na njoj bogate.

Da nisu žalosne bile bi smiješne priče o Evropi o evroatlanskim integracijama, procesu stabilizacije i pridruživanja, a naravno još smješnija je priča o potpisivanju sporazuma o stabilizaciji i pridruživanju od političara koji nisu mrđnuli prstom da se vrati vlasnicima njihova stara devizna štednja, niti da se privedu pravdi oni koji su ih opljačkali, nego naprotiv i dalje se čini sve kako bi se pljačka nastavila. Relevantne međunarodne institucije su upoznate sa svim dešavanjima vezanim za staru deviznu štednju i na pitanja koja se nju odnose trebaće odgovoriti prije nego se naprave odlučni koraci u pristupanju Evropskoj uniji.

U Evropi znaju da vlasnici nisu mogli svojom starom deviznom štednjom učestvovati u privatizaciji, ali da su neki povlašteni mogli. Znaju da su staru deviznu štednju kupovali za samo 10 do 20% njene nominalne vrijednosti, a onda u otprilike istom omjeru spram vrijednosti imovine kupovali državni kapital. Takozvani "anonimni kupci" postaće javni, odnosno njihova će imena biti objavljena kada im se bude sudilo za pljačku i kriminal. Naša najnovija otkrića ukazuju na razmjere pljačke koje je teško zamisliti, koje su halapljivi gramzivci doveli do perfekcije. Ostaje samo da se kaže po sto puta "Ma je li to moguće!!!" Naime, "anonimni" kupci su kupovali staru deviznu štednju i isknjižili je od vlasnika na svoje račune, a da je pri toj transakciji nisu plaćali. Sa tom starom deviznom štednjom na pravno nemogući, ali njima dostupan načinsu kupovali državni kapital, cijele fabrike, preduzeća i slično. Ubrzo su ih preprodavali, a da nikada nisu isplatili vlasnike stare devizne štednje. Vlasnici stare devizne štednje su podizali tužbe zbog toga što im stara devizna štednja nije plaćena i sudovi presuđuju u njihovu korist. Sada se na njihove račune, u štedne knjižice ponovo upisuju ranije isknjiženi iznosi, a o novcu i bogastvu kupljenom pa preprodanom nekoliko puta izgleda niko i ne razmišlja.

Sve ovo se nebi moglo uraditi da nema APIF-a koji isključivo za to i služe. To su institucije koje služe za legalizaciju krađe, pranje novca i skrivanje vlasnika prljavog kapitala.

Na sastanku Radne grupe po pitanju stare devizne štednje održanom u Bijaću 9. i 10. jula 2007. godine jedan od zaključaka je bio da nadležna entitetska ministarstva i ministarstvo Brčko Distrikta BiH pokrenu postupak revizije verifikacije. To naravno nije urađeno. To i ne treba početi raditi dok se ne stvore odgovarajuće pretpostavke u vidu proširenja zatvorskih kapaciteta. Mi znamo šta se tamo radilo i sada se radi. To uopšte nije problem utvrditi, naravno, samo ako se to želi.

Trenutna situacija da se stara devizna štednja treba vratiti vlasnicima u roku od oko 27 godina je apsolutni dokaz da se u Bosni i Hercegovini krše ljudska prava u pogledu prava raspolaganja imovinom. Postupak po kolektivnoj predstavi smo pokrenuli za iznos osnovnog duga cca jedne milijarde KM. Isto tako smo pokrenuli postupke protiv Republike Slovenije i Republike Srbije.

Poštovana gospodo,

Izmjene i dopune Zakona o izmirenju obaveza po osnovu računa stare devizne štednje koje su još u toku mi u Udruženju građana za povrat stre devizne štednje u Bosni i Hercegovini i dijaspori doživljavamo kao svojevrsnu provakaciju i sprdanje sa vlasnicima stre devizne štednje. U tom smislu Vam skrećemo pažnju da je jedino moguće rješenje na koje smo spremni pristati usvajanje rješenja iz zakona koji je bio usvojio Predstavnički dom 18. septembra 2006. godine, tj. Rok za isplatu od 5 godina uz kamatu od 5%, kao i mogućnost da se starom deviznom štednjom može kupovati gradsko građevinsko zemljište, plaćati građevinske dozvole i građevinski materijal, lijekovi i liječenje, poljoprivredno zemljište, te kupovati stanovi i poslovni prostori u državnoj

svojini. Sve ostalo će bit samo razlog da iziđemo na ulicu i sami tražimo pravdu. Spremni smo ući u banke i vratiti ih nakon 27 godina. Od posla sa obveznicama neće biti ništa. Oni koji su se spremili da ih kupuju za smješni procenat njihove nominalne vrijednosti neka prestanu trljati ruke. Od tog posla neće biti ništa.

Blokiraćemo život u Bosni i Hercegovini isto onako kako je blokiran naš već više od 18 godina. Reviziju APIF-a vršićemo sami. Ostaćemo dostojanstveni iako smo dovedeni u stanje bijede i siromaštva. Satisfakcija će nam biti činjenica da će se lopovi i kriminalci naći iza brave i da će ih stići ruka pravde.

Zbog suše i požara nam najvaljujete eksploziju cijena i poskupljenja, a evo i mi stare devizne štedišu najavljujemo Vama eksploziju našeg nezadovoljstva i gnjeva, kako što nam se ne vraće naš pošteno zarađene devize, tako i zbog toga što se uz pomoć vlasti u Bosni i Hercegovini nastavlja naša pljačka i na našoj nesreći nastavlja bogaćenje bezobzirnih pljačkaša i kriminalaca.

Odlučni smo na to jednom staviti tačku.

S poštovanjem,

Za Upravni odbor
predsjednik

(**Svetozar Nišić**)

Dostavljeno:

1. OHR;
2. Jan-Paul Costa, predsjednik Evropskog suda za ljudska prava
3. Thorbjørn Jagland, generalni sekretar Vijeća Evrope,
4. Tomas Hamerberger, komesar za ljudska prava pri Vijeću Evrope,
5. Jose Manuel Barosso, predsjednik Evropske komisije
6. PS BIH svim poslanicima i delegatima
7. Tužilaštvu BiH;
8. SIPA Finsijsko obavještajno odjeljenje i
9. Mediji